

Las finamiras ch'èn vegnidas formuladas ensemen cun las acturas ed ils acturs e la strategia da svilup fixada vegnan concretisadas areguard il spazi en differents concepts en il rom da la procedura tschernida. Per quest intent ston l'incumbensa ed ils criteris da decisiun vegnir formulads l'emprim cleramain en in carnet d'obligaziuns.



## Situaziun da partenza

### **Èsi definì cleramain, per incarica da tgi che la procedura vegn realisada?**

Per las candidatas ed ils candidats resp. per las participantas ed ils participants ston esser cler, tgi ch'è l'incumbensadra u l'incumbensader.

### **È la situaziun da partenza clera?**

I sto vegnir explitgà chapavlamain, pertge che la planisaziun vegn fatga e da tge ch'i sa tracta en la singula procedura sco er en l'entir process da planisaziun.

### **Èn las finamiras da la procedura / da la planisaziun cleras?**

Il carnet d'obligaziuns sto mussar tge finamiras che duain vegnir cuntanschidas cun la procedura.

## Disposiziuns generalas

### **Mussa il carnet d'obligaziuns l'organisaziun da la procedura?**

I duess esser cler, co e da tgi che la procedura vegn organisada ed accompagnada.

### **Vegn definì il tip da procedura?**

Il carnet d'obligaziuns sto mussar, da tge furma d'acquisiziun e da tge tip da procedura ch'i sa tracta e co che questa furma u quest tip è concepi, p.ex. concorrenza cun qualificaziun preliminar, concorrenza da dus stgalims, incarica da studi e.u.v. (HS 2.4).

### **Èsi cler, tge criteris che ston vegnir ademplids per avair il dretg da participaziun?**

Per las candidatas ed ils candidats resp. per las participantas ed ils participants ston esser cler, tge criteris ch'els ston ademplir per avair il dretg da sa participar.

### **Inditgescha il carnet d'obligaziuns ils aspects giuridics necessaris?**

En il carnet d'obligaziuns ston vegnir scleridas dumondas davart la proprietad, davart il dretg d'autur e davart il dretg dals bains immaterials en quai che riguarda ils plans, ils models, ils resultats da las lavurs, ils intents d'utilisaziun e.u.v.

### **È la vigur lianta dal carnet d'obligaziuns sclerida?**

I duess esser cler, per tgi ch'il carnet d'obligaziuns è liant. Per regla è el liant per tut las acturas e tut ils acturs ch'èn participads a la procedura.

### **Vegn l'ulteriur proceder explitgà en il carnet d'obligaziuns?**


Declaraziuns d'intenziun da l'incumbensadra u da l'incumbensader concernent l'ulteriur proceder, concernent l'incarica successiva e.u.v. ston vegnir explitgadas en il carnet d'obligaziuns.

### **Existan indicaziuns davart l'indemnisaziun (summa totala dals premis)?**

Las candidatas ed ils candidats resp. las participantas ed ils participants ston vegnir infurmads, co che la summa totala dals premis resp. l'indemnisaziun vegn tractada en quai che riguarda ils premis, las acquisiziuns, las indemnisaziuns, la calculaziun da las summas e.u.v.

### **Èsi cler, tgi che fa part da l'istanza da decisiun?**

Il carnet d'obligaziuns sto mussar, tgi che fa part da l'istanza da decisiun. El sto er infurmar davart substitutas e substituets e davart expertas ed experts ch'èn eventualmain gia enconuschents.



## **Realisaziun**

### **È avant maun la trasparenza ch'è convegnenta per la procedura?**

Tut tenor la procedura tschernida ston tschertas tematicas, sco p.ex. personas participadas, teams envidads u selecziunads e.u.v., esser visiblas per tuts.

### **Èsi cler, sche ed en tge furma ch'i vegn tschertgà in dialog durant la procedura?**

Tut tenor la furma d'acquisiziun e tenor la procedura sa manifestescha il dialog en differenta maniera u n'è in dialog insumma betg avant maun. Quai duess esser evident en il carnet d'obligaziuns.

### **Vegnan enumerads ils documents consegnads?**

Ils documents consegnads duessan vegnir enumerads en il carnet d'obligaziuns. Uschia han las candidatas ed ils candidats resp. las participantas ed ils participants la tschertezza ch'els han survegni tut ils documents necessaris per la procedura.

### **Èn fixads ils termins e las datas?**

Aspects dal temp – sco in'occurrenza inziala, ina data da consegna, termins d'inoltraziun per dumondas e.u.v. – ston vegnir fixads obligatoricamain en il carnet d'obligaziuns.

### **Èn avant maun tut las infurmaziuns necessarias per la consegna?**

Per las candidatas ed ils candidats resp. per las participantas ed ils participants ston esser cler, en tge furma ed en tge dimensiun che la consegna ha lieu (er, sche variantas vegnan pretendidas, èn admissiblas u èn exclusas). Medemamain ston esser visiblas las infurmaziuns davart il lieu, davart la data e davart las uras da la consegna.

### **Èsi cler per las candidatas ed ils candidats resp. per las participantas ed ils participants, sin basa da tge criteris e tenor tge proceder che las inoltraziuns vegnan giuditgadas?**

Ils criteris da giudicament sco er lur valitaziun ed il proceder per la valitaziun ston vegnir definids gia en il carnet d'obligaziuns.

## **Incumbensa / cundiziuns generalas**

### **Vegn l'incumbensa explitgada cleramain en il carnet d'obligaziuns?**

Per survegnir resultats cumparegliabels sto l'incumbensa vegnir declarada uschia, ch'i n'exista sche pussaivel nagina libertad d'interpretaziun u eventualmain mo la libertad d'interpretaziun giavischada.

### **Vegnan fatgas indicaziuns davart las finamiras avisadas, davart las pretensiuns e davart ils singuls secturs tematics?**

A las candidatas ed als candidats resp. a las participantas ed als participants ston vegnir declarà cleramain, tge finamiras e pretensiuns che ston vegnir ademplidas cun lur proposta da soluziun – d'ina vart en general, da l'autra vart areguard singulas tematicas sco utilisaziun, spessegia, spazis libers, etappaziun e.u.v.

### **Existan indicaziuns davart il perimenter?**

Tut tenor l'object da planisaziun e tenor las relaziuns localas pon vegnir determinads plirs perimeters (perimeter da concorrenza, perimeter da project, perimeter da consideraziun, perimeter d'elavuraziun e.u.v.). En il carnet d'obligaziuns ston vegnir definì cleramain, tge perimeter che ha tge funcziun e tge prestaziuns che ston vegnir furnidas.

### **Èn preschentadas tut las cundiziuns generalas planisatoricas?**

Per che tut las candidatas e tut ils candidats resp. tut las participantas e tut ils participants hajan il medem stadi da savida, duessan vegnir enumeradas las cundiziuns generalas planisatoricas las pli impurtantas tenor HS 2.1 e duess vegnir explitgada lur influenza sin la planisaziun currenta.